



**Broj: 02-50-1-16-15/08
Sarajevo: 7.4.2008. godine**

**ZAPISNIK
15. sjednice Doma naroda
Parlamentarne skupštine Bosne i Hercegovine,
održane 7.4.2008.godine**

Sjednica je počela u 11,50 sati.

Sjednicom je predsjedavao Sulejman Tihić, predsjedavajući Doma naroda Parlamentarne skupštine BiH.

Sjednici je prisustvovalo 15 delegata.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija i sredstava javnog informiranja.

Dom naroda jednoglasno je usvojio sljedeći izmijenjeni

D N E V N I R E D

1. Odgovori na delegatska pitanja i delegatska pitanja;
2. Usvajanje Zapisnika 14. sjednice Doma naroda;
3. Prijedlog zakona o izmjenama i dopunama Zakon o upotrebi i zaštiti naziva Bosne i Hercegovine, (drugo čitanje), predlagač: Vijeće ministara BiH;
4. Prijedlog okvirnog zakona o zaštiti i spašavanju ljudi i materijalnih dobara od prirodnih ili drugih nesreća u BiH, (prvo čitanje), predlagač: Vijeće ministara BiH;
5. Prijedlog zakona o izmjenama i dopunama Zakona o krivičnom postupku BiH, (prvo čitanje), predlagač: Vijeće ministara BiH;
6. Prijedlog zakona o izmjenama i dopunama Zakona o osnovama sigurnosti saobraćaja na putevima u BiH, (prvo čitanje), predlagač: Predstavnički dom;
7. Izvještaj Zajedničke komisije za usaglašavanje teksta o Prijedlogu zakona o izmjenama i dopunama Zakona o putnim ispravama BiH;
8. Izvještaj o usaglašavanju teksta Zaključka o osnivanju Privremene zajedničke komisije za utvrđivanje stare devizne štednje građana BiH položene na račun domicilnih banaka i filijala u BiH;
9. Odluka Predsjedništva BiH o utvrđivanju kandidata za generalske pozicije u Oružanim snagama Bosne i Hercegovine (broj: 01,02-03-110/08, od 23. 1. 2008), radi potvrđivanja;
10. Izvještaj o radu Državne regulatorne komisije za električnu energiju u 2007. godini;
11. Davanje saglasnosti za ratifikaciju Sporazuma između Vijeća ministara BiH i vlada ostalih zemalja učesnica SEECP-a, Misije privremene uprave Ujedinjenih naroda na Kosovu, u ime Kosova, u skladu s Rezolucijom Vijeća sigurnosti UN-a broj 1244 o aranžmanima zemlje domaćina za Sekretarijat Vijeća za regionalnu saradnju;
12. Davanje saglasnosti za ratifikaciju Sporazuma između Vijeća ministara BiH i Vlade Republike Mađarske o uspostavljanju Okvirnog programa za finansijsku saradnju;

13. Davanje saglasnosti za ratifikaciju Druge izmjene i dopune Sporazuma o kreditu i finansiranju, od 23. novembra 2004. godine, između Bosne i Hercegovine, Federacije Bosne i Hercegovine, Republike Srpske i Kreditanstalt für Wiederaufbau – Frankfurt na Majni „KFW“ – Sanacija gradskih vodovoda i kanizacionih sistema u Bosni i Hercegovini;
14. Prijedlog odluke o izmjeni Odluke o izboru članova Zajedničkih komisija oba doma Parlamentarne skupštine BiH.

Ad.1. Odgovori na delegatska pitanja i delegatska pitanja

Odgovor na delegatsko pitanje postavljeno na 6. sjednici Doma naroda dobila je Dušanka Majkić.

Delegat Dušanka Majkić izjasnila se da je samo djelimično zadovoljana odgovorom dobivenim od Vijeća ministara BiH.

Delegat Ivo Miro Jović postavio je sljedeće pitanje Vladi Federacije BiH, Komisiji za očuvanje spomenika i Općini Visoko :

„ Komisija za očuvanje spomenika je još u julu 2003. godine donijela Odluku o zaštiti arheološkog područja Mile – Krunidbene i grobne crkve bosanskih kraljeva u Visokom: Šta je do danas urađeno na provođenju ove odluke? „

Delegat Dušanka Majkić ponovila je pitanje Vijeću ministara BiH, postavljeno na 10. sjednici Doma naroda, održanoj 4.12.2007., koje glasi:

„Molim Vijeće ministara BiH da mi odgovori šta je do sada urađeno s pronalaženjem adekvatnog rješenja pravnog statusa JPNIO „Službeni list“ BiH, Sarajevo.,

Ujedno, delegat Dušanka Majkić postavila je o istoj temi i sljedeća pitanja:

1. „Dokle je došla izrada Zakona o Službenom listu BiH, koji je trebalo da uradi stručna komisija koju je osnovalo Ministarstvo pravde BiH“?
2. „Ako je Vijeće ministara BiH još 2004. godine donijelo Odluku o privremenom preuzimanju osnivačkih prava Službenog lista, zašto na osnovu te odluke nije raspisan konkurs za izbor članova Upravnog odbora“?

Delegat Ilija Filipović postavio je sljedeće pitanje Vijeću ministara BiH:

„S obzirom da se Vlada Federacije BiH, prioritete izgradnje dionica Autoputa na Koridoru V c, koje prolaze kroz Federaciju BiH, odlučila utvrđivati svojim pojedinačnim odlukama i definirati opći interes za svaku dionicu, i to čini tako da odlukama definiira samo pojedine prioritete dionice Autoputa na Koridoru Vc:

1. Zašto se to tako radi i da li su takve odluke Vlade FBiH rezultat dogovora s Vijećem ministara BiH ili nekom drugom nadležnom institucijom i kojom?
2. Hoće li Vijeće ministara BiH preduzeti bilo kakve mjere i kada s ciljem sprečavanja namjernog odugovlačenja i očiglednog pokušaja zaustavljanja provođenja i izgradnje projekta Koridora V c od strane Vlade Federacije BiH na dionicama sa sjeverne granice kroz Posavinu i s južne strane kroz Hercegovinu, kako je to odlučeno za druge dionice unutar Federacije BiH? “

Delegat Mladen Ivanić postavio je sljedeće pitanje Vijeću ministara BiH :

„Vijeće ministara BiH utvrdilo je obavezu da do 15. februara predloži, u saradnji s vladama entiteta, program zaštite socijalno ugroženih kategorija stanovništva. U javnim nastupima predsjedavajućeg, članova Vijeća i direktora Uprave za indirektno oporezivanje pominjala se mogućnost uvođenja dvije stope PDV - a.

Zašto ovaj program kasni i da li će uključivati uvođenje dvije stope PDV - a.“

Delegat Zoran Koprivica postavio je sljedeće pitanje Vijeću ministara BiH :

„Prije godinu dana, razmatrajući Izvještaj o radu Pravobranilaštva BiH za 2006. godinu, jedan od zaključaka i zahtjeva Ustavnopravne komisije Doma naroda po pitanju zaštite imovine BiH u inozemstvu bio je da se zadužuje Vijeće ministara BiH da hitno osnuje komisiju koja će izvršiti popis imovine u inozemstvu te o tome sačiniti odgovarajući registar, obavijestiti sve nadležne organe i institucije o zatečenom stanju i problemima, radi preduzimanja odgovarajućih mjera po pitanju čuvanja i zaštite navedene imovine.

Evidentno je da u javnosti o tome nema nikakvih povratnih informacija šta je konkretno preduzeto, da li je osnovana komisija i koji su rezultati njenog rada, da li je Pravobranilaštvu BiH dostavljen registar imovine BiH u inozemstvu radi daljnjeg postupanja.“

Delegat Sulejman Tihić postavio je sljedeće pitanje Vijeću ministara BiH i Državnoj graničnoj službi :

„Zašto na ulazu u BiH, na graničnom prijelazu ne stoji naziv – tabla sa tekstom: „Dobrodošli u Bosnu i Hercegovinu?“

Naime, imamo table s natpisima Dobrodošli u Republiku Srpsku, Hercegovačko- neretvanski kanton, a nisam vidio natpis Dobrodošli u Bosnu i Hercegovinu. Zašto? Mislim da treba na svakom graničnom prijelazu na prvom mjestu da stoji: „Dobrodošli u Bosnu i Hercegovinu“, a tek onda ostale dobrodošlice. “

Delegat Adem Ibrahimpašić postavio je sljedeće pitanje Vijeću ministara BiH:

„Kada će se vratiti u parlamentarnu proceduru Zakon o izmjeni i dopuni Zakona o carinskoj tarifi koji je prije pet mjeseci poslan, i Zakon i amandmani, na izjašnjavanje Upravi za indirektno oporezivanje? “

Delegat Slobodan Šaraba postavio je sljedeće pitanje Vijeću ministara BiH:

„Republika Hrvatska je, počev od 1.11.1993., iz sistema HET – a bez ičije saglasnosti i kršeći ranije postignut dogovor počela da preuzima i danas preuzima više električne energije nego što joj pripada po sporazumu zaključenom 1965. godine između Vlade BiH i Hrvatske (tadašnji predsjednik Rude Kolak i Mika Špiljak) – omjer u raspodjeli električne energije tada je bio 78:22 HE.

Hidroelektrane na Trebišnjici su o ovom ogromnom problemu za energetske sektor (trenutni dug je preko 150.mil KM prema Elektroprivredi Republike Srpske i Federacije BiH) obavijestile sve nadležne institucije u BiH i međunarodnu zajednicu s obzirom na međunarodni aspekt ovog problema, tražeći da ovo pitanje konačno bude stavljeno na dnevni red Međudržavnog vijeća BiH i Hrvatske.

Šta namjerava preduzeti Vijeće ministara BiH da riješi ovo ključno i složeno pitanje i kada će pokrenuti aktivnosti u tom pravcu budući na ogromne štetne posljedice koje su svakog dana veće.“

Ad.2. Usvajanje Zapisnika 14. sjednice Doma naroda

Rasprava o ovoj tački dnevnog reda nije vođena.
Dom naroda jednoglasno je usvojio Zapisnik 14. sjednice Doma naroda.

Ad.3. Prijedlog zakona o izmjenama i dopunama Zakon o upotrebi i zaštiti naziva Bosne i Hercegovine, (drugo čitanje), predlagač: Vijeće ministara BiH

Rasprava o ovoj tački dnevnog reda nije vođena.
Dom naroda jednoglasno je usvojio Zakon o izmjenama i dopunama Zakon o upotrebi i zaštiti naziva Bosne i Hercegovine u predloženom tekstu.
S obzirom da je Zakon usvojen u različitom tekstu u odnosu na Predstavnički dom, Dom naroda imenovao je sljedeće delegate za članove Zajedničke komisije za postizanje sporazuma o identičnom tekstu Zakona:

Zorana Koprivicu,
Ivu Miru Jovića i
Hazima Rančića.

Ad.4. Prijedlog okvirnog zakona o zaštiti i spašavanju ljudi i materijalnih dobara od prirodnih ili drugih nesreća u BiH (prvo čitanje), predlagač: Vijeće ministara BiH

U raspravi o ovoj tački dnevnog reda učestvovala je Dušanka Majkić.
Dom naroda jednoglasno je usvojio u prvom čitanju Prijedlog okvirnog zakona o zaštiti i spašavanju ljudi i materijalnih dobara od prirodnih ili drugih nesreća u BiH.

Ad.5. Prijedlog zakona o izmjenama i dopunama Zakona o krivičnom postupku BiH (prvo čitanje), predlagač: Vijeće ministara BiH

U raspravi o ovoj tački dnevnog reda učestvovala je Dušanka Majkić.
Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o krivičnom postupku BiH.

Dom naroda također je usvojio zaključak da se održi javna rasprava o Prijedlogu zakona o izmjenama i dopunama Zakona o krivičnom postupku BiH.

Ad.6. Prijedlog Zakona o izmjenama i dopunama Zakona o osnovama sigurnosti saobraćaja na putevima u BiH (prvo čitanje), predlagač: Predstavnički dom

U raspravi o ovoj tački dnevnog reda učestvovali su: Dušanka Majkić, Mladen Ivanić, Rudo Vidović, Adem Ibrahimpašić, Ivo Miro Jović, Sulejman Tihić, Hilmo Neimarlija i Božo Rajić.

Dom naroda je, sa devet glasova „za“, tri glasa „protiv“ i jednim „suzdržanim“ glasom uz postojanje entitetske većine, usvojio Izvještaj nadležne komisije koja **nije** prihvatila principe Prijedloga zakona o izmjenama i dopunama Zakona o osnovama sigurnosti saobraćaja na putevima u BiH čiji je predlagač Predstavnički dom, te samim tim je Prijedlog zakona odbijen.

Ad.7. Izvještaj Zajedničke komisije za usaglašavanje teksta o Prijedlogu zakona o izmjenama i dopunama Zakona o putnim ispravama BiH

Rasprava o ovoj tački dnevnog reda nije vođena.

Dom naroda jednoglasno je usvojio Izvještaj Zajedničke komisije za usaglašavanje teksta Zakona o izmjenama i dopunama Zakona o putnim ispravama Bosne i Hercegovine.

Ad.8. Izvještaj o usaglašavanju teksta Zaključka o osnivanju Privremene zajedničke komisije za utvrđivanje stare devizne štednje građana BiH položene na račun domicilnih banaka i filijala u BiH

Rasprava o ovoj tački dnevnog reda nije vođena.

Dom naroda je, sa 11 glasova „za“ i jednim glasom „protiv“, i jednim „suzdržanim“ glasom uz postojanje entitetske većine, usvojio Izvještaj o usaglašavanju teksta Zaključka o osnivanju Privremene zajedničke komisije za utvrđivanje stare devizne štednje građana BiH položene na račun domicilnih banaka i filijala u BiH.

Ad.9 Odluka Predsjedništva BiH o utvrđivanju kandidata na generalske pozicije u Oružanim snagama BiH (broj: 01,02-03-110/08, od 23. 1. 2008.), radi potvrđivanja

Rasprava o ovoj tački dnevnog reda nije vođena.

Dom naroda jednoglasno je potvrdio Odluku Predsjedništva BiH o utvrđivanju kandidata za generalske pozicije u Oružanim snagama BiH(broj: 01,02-03-110/08, od 23.1.2008.) u predloženom tekstu.

Ad.10 Izvještaj o radu Državne regulatorne komisije za električnu energiju u 2007. godini

U raspravi o ovoj tački dnevnog reda učestovali su: Slobodan Šaraba, Dušanka Majkić i Ivo Miro Jović.

Dom naroda jednoglasno je usvojio Izvještaj o radu Državne regulatorne komisije za električnu energiju u 2007. godini sa sljedećim zaključkom:

„Dom naroda Parlamentarne skupštine BiH traži od Vijeća ministara BiH da ubrza proceduru imenovanja članova Državne regulatorne komisije za električnu energiju kojima je istekao mandat, kako bi ona radila punim kapacitetom.“

Ad.11., 12. i 13. Davanje saglasnosti za ratifikaciju sporazuma

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju:

- Sporazuma između Vijeća ministara BiH i vlada ostalih zemalja učesnica SEECp-a, Misije privremene uprave Ujedinjenih naroda na Kosovu, u ime Kosova, u skladu s Rezolucijom Vijeća sigurnosti UN-a broj 1244 o aranžmanima zemlje domaćina za Sekretarijat Vijeća za regionalnu saradnju
- Sporazuma između Vijeća ministara BiH i Vlade Republike Mađarske o uspostavljanju Okvirnog programa za finansijsku saradnju
- Druge izmjene i dopune Sporazuma o kreditu i finansiranju, od 23. novembra 2004., između Bosne i Hercegovine, Federacije Bosne i Hercegovine, Republike Srpske i Kreditanstalt für Wiederaufbau – Frankfurt na Majni „KfW“ – Sanacija gradskih vodovoda i kanalizacionih sistema u Bosni i Hercegovini.

Ad.14. Prijedlog odluke o izmjeni Odluke o izboru članova zajedničkih komisija oba doma Parlamentarne skupštine BiH

Dom naroda jednoglasno je prihvatio ostavku dr. Mladena Ivanića na članstvo u Zajedničkoj sigurnosno-obavještajnoj komisiji za nadzor nad radom Obavještajno-sigurnosne agencije BiH, te donio odluku da se Drago Ljubičić imenuje za člana u Zajedničkoj sigurnosno-obavještajnoj komisiji za nadzor nad radom Obavještajno-sigurnosne agencije BiH.

Sjednica je završena u 13,05 sati.

Sastavni dio ovog zapisnika je neautorizirani transkript 15. sjednice Doma naroda.

**SEKRETAR
DOMA NARODA**
Marin Vukoja

**PREDSJEDAVAJUĆI
DOMA NARODA**
Sulejman Tihić, dipl.iur.